

**S** Afl. 1.25 **LO**

BRIYANDO FUERTE • TRECIENDO CLARIDAD  
DIASABRA 17 FEBRUARI 2024

*Di Pueblo*

**EXITOSO PROYECTO PA DUNA  
AYUDO CU CUMINDA PA  
MASCOTA MANEHA PA CENTRO  
CONTROL DI CACHO**



**WWW.SOLODIPUEBLO.COM**



**SOLODIPUEBLO@GMAIL.COM**



**STICHTING HUNTO  
TA OFICIALMENTE  
UN REALIDAD:  
UN SIMBOLO DI  
SPERANSA Y  
INOVACION PA  
ARUBA**



**15 DI FEBRUARI TA UN DIA  
GRANDI  
"NOS A LOGRA PA E PROME  
BARCO CU HFO MAS BARATA  
YEGA ARUBA"**

**PABIEN, ARUBA A LUCI COMO UN DI CARNAVALNAN  
MAS LUHOSO Y SIGUR NA MUNDO**





Minister Ursell Arends:

# COMMISSIE CORPORATE GOVERNANCE TA PRESENTA SU RAPORTAHE FINAL

**Siguiente paso pa Corporate Governance: Implementacion!**

Commissie Corporate Governance a entrega su raportahe final na Minister di Integridad y Minister di Asuntonan General durante un reunion dia 15 di februari 2024. E raportahe final, cu ta obtenibel riba Publico.aw, no ta trata solamente di e trabounan cu e Comision a realisa durante e ultimo 2.5 aña, pero tambe ta duna recomendacion pa e siguiente pasonan pa e trayecto di implementacion. E Comision a consisti di Sr. Jossy Laclé como presidente, sr. Fredis Refunjol, sr. mr. Arie Swaen y sra. dr. mr. Hellen van der Wal. E miembronan a wordo gradici pa e trabounan cu nan a ehecuta na un forma profesional. Aruba lo por conta e aña aki ainda cu un ley moderno di corporate governance, dirigi na gobierno y entidadnan den sector publico y semi-publico.

Sr. Jossy Laclé a urgi pa priorisa e introduccion y implementacion di e ley: 'Aruba ta en espera di esaki!', el a declara den e prologo di e raportahe. Minister Arends a confirma cu a base di conseho di e Comision, e lo instala un 'Implementatieteam' cu lo traha hunto cu sector (semi-)publico pa realisa e implementacion di e proposicion di ley y ehecutacion di reglanan di good corporate governance.



Commissie Corporate Governance a wordo instala na 2020 pa traha un Raamwerk Corporate Governance, cu ta dirigi riba aumento di e nivel di good corporate governance di entidadnan semi-gubernamental na un forma duradero. E raamwerk ta inclui entre otro un ontwerp-Landsverordening Corporate Governance, dirigi na gobierno, y un Code Corporate Governance, dirigi na entidadnan semi-gubernamental.

Implementacion di e raamwerk cu e Comision a desaroya lo tin un impacto substancial, no solamente pa entidadnan den sector semi-publico, pero tambe pa e gabinete mes. Cu implementacion di e ley y

reglanan di corporate governance, Aruba lo kibra un tradicion bieu door di traha formalmente cu vacatura, perfil di funcion y rekisitonan specifico ora di nombra director y miembro di hunta di comisario. E Comision a tende repetidamente cu esaki lo ta un reto pa Aruba. Den e prologo di e raportahe, sr. Jossy Laclé ta remarca cu conseho di minister completo a bay di acuerdo cu puntonan di salida di good corporate governance y a aproba e vision y conseho di e Comision. 'Pa e Comision, e commitment

aki tawata un rekisito crucial pa por a avansa e trabounan na un forma serio,' segun sr. Laclé. 'Awor ta necesario pa e Raamwerk realmente wordo implementa y pa tur esnan involvi den corporate governance di entidadnan den sector publico y semi-publico – riba tur nivel – contribui na realisacion di e interesnan di e comunidad di Aruba na un forma eficiente, efectivo y eficaz. Esey ta e meta final.'

E raportahe final y mas documento ta obtenibel riba Publico.aw.

**CAMBIA  
PERSPECTIVA  
TOCANTE  
OBESIDAD:  
SA BO NUMBER  
Y MIDI BO PESO**



## CUENTA DI BANCO PA HACI PAGO DI ABONNEMENT ONLINE

Accountname: **Sunmax Printers**  
Adres: **Sta. Cruz 110** Bank: **RBC**  
Account number: **77 00000 100152447**





## Prome Minister Evelyn Wever-Croes: APERTURA OFICIAL EDIFICIO STICHTING HUNTO



Diahuebs 15 di februari a tuma luga e apertura oficial di e edificio di Stichting HUNTO na caya Appeldam den Dakota. Na e ocasion aki Prome Minister Evelyn Wever-Croes a hiba palabra felicitando y gradiciendo tur cu a haci esaki posibel.

Na Aruba tin un problema di salud mental y adiccion cu ta cuminsa manifesta su mes ya den muchanan relativamente jong y mester ataca esaki cu tempo. A cuminsa traha riba e problematica aki den pasado pero e pandemia a frena esaki y a haci'e pio. El a trece e salud mental

riba otro nivel y e tempo ey a eleva esaki na nivel di crisis y a aloca fondo specialmente pa adresa esaki y awe por wak e resultado.

Institutonan cu tawata traha banda di otro riba e tema di salud mental y adiccion, awe ta traha hunto bou di un capa, esaki di Stichting HUNTO. E edificio ta sumamente bunita y adecua, parti den dos: un parti pa adulto y un pa muchanan jong. Esaki ta haci cu adultonan y e muchanan jong no mester crusa otro. Na Stichting HUNTO e tratamentonan ta wordo duna mesora na adulto y mucha, y esaki ta

algo cu Gobierno a boga p'e mescos pa e lista di espera bira menos y na un momento por wordo elimina por completo.

Minister President a expresaditainmensamente orguyoso di esnan cu a construi e bunita edificio pero principalmente e ta orguyoso di e trahadornan cu ta traha duro y hunto pa atende e tema di adiccion y salud mental. Tambe e mandatario a sigui bisa di ta hopi orguyoso di ta lidera un gobierno cu a pone e proyecto aki como un prioridad y poniendo e ser humano central. Esaki ta inclui salud mental y adiccion cu ta temanan cu mester traha riba nan.

Prome Minister, den su



discurso na e ocasion aki, a tuma e oportunidad pa gradici Minister Glenbert Croes cu desde tempo di e crisisplan a cuminsa den e direccion aki pero lamentablemente a wordo frena pa e pandemia. Na e mesun momento, Prome Minister a manda palabranan di elogio na Minister Rocco Tjon cu a tuma e cartera over di asuntonan social y di salud

mental na e momento ey y hunto cu su ekipo y cu hopi determinacion y vision a persevera y awe por celebra e apertura di e edificio aki. "Un pabien na tur esnan cu ta traha na Stichting HUNTO cu ta traha cu salud mental y pa bringa adiccion di nos muchanan y nos adultonan. Cu Dios bendiciona boso cu e trabou cu boso ta haci", Prome Minister a expresa.



## Minister Ursell Arends:

# EXITOSO PROYECTO PA DUNA AYUDO CU CUMINDA PA MASCOTA MANEHA PA CENTRO CONTROL DI CACHO

E siman aki nos a reuni cu fundacion internacional Locks 4 Paws y Centro Control di Cacho(CCC) caminda a ricibi un resumen di e desaroyonan di e programa: Locks 4 Paws Pet Pantry

Durante un periodo di menos di un aña a logra yuda cu 42.192 cuminda pa mascota, a duna cuminda na 1272 mascota y a yuda un total di 190 famia na Aruba.

Un proyecto piloto exitoso cu a inicia aña pasa conhuntamente cu Locks

4 Paws caminda a pone pet pantries na CCC pa asina yuda famianan den necesidad.

E comentario di esnan cu a wordo yuda ta cu danki na e programa aki nan por a keda cu nan mascota stima y awe ta disfruta di nan mascota como parti di famia.

E meta di e proyecto aki ta pa sigui yuda mas famianan den necesidad cu cuminda pa nan mascotanan. CCC ta bay continua di maneha e pet pantry aki conhuntamente



cu Locks 4 Paws pa asina sigui brinda mas mascota riba nos isla cu cuminda.

Pa esnan cu mester di ayudo cu esaki por pasa tuma contacto libremente

cu CCC pa mas informacion na 5927777.

## Minister Dangui Oduber

# PROF DR. VAN BENTHEM DI LEIDS UNIVERSITAIRE MEDISCH CENTRUM DI BISHITA NA ARUBA PA SONDEA POSIBILIDAD DI COOPERACION CU ARUBA PA SIGUI ELEVA CALIDAD DI CUIDO NA ARUBA



E Leids Universitair Medisch Centrum (LUMC) y Ministerio di Salud Publico tin intencion pa traha hunto y asina prepara un acuerdo (MOU) pa formalisa e colaboracion aki.

E MOU tin como meta pa amplia e oportunidadnan di entrenamiento, intercambia conocimiento y pa formalisa e entrenamiento continuo

di Aruba su profesionalnan di cuido. Tambe lo tin como meta reforsa e servicio di cuido di salud riba nos isla. Esaki ta inclui entre otro e ofrecemento di luganan di entrenamiento riba nivelnan mas halto pa nos specialistanan y explora posibilidadnan pa estudianan di medicina na studiantenan Arubiano. Tambe



investiga posibilidadnan pa colaboracion riba e tereno di capacidad di personal y cuido complejo.

E iniciativa aki ta danki na e Zorgakkoord cu a keda firma na Juli 2023. Implementacion y evaluacion di e colaboracion aki lo wordo ehecuta dor di un "taskforce", caminda tur partidonan lo ta envolvi.

E colaboracion aki entre LUMC y Pais Aruba lo trece beneficiaran considerabel pa tur dos partidonan y ta contribui na un desaroyo continuo di cuido di salud di calidad pa e pueblo di Aruba.

Minister Dangui Oduber y LUMC ta ancioso pa reforsa e colaboracion y logra metanan cu nos tin en comun.



# Minister Glenbert Croes: 15 DI FEBRUARI TA UN DIA GRANDI "NOS A LOGRA PA E PROME BARCO CU HFO MAS BARATA YEGA ARUBA"

Diahuebs 15 di Februari ta un dia grandi pa Aruba. Minister Glenbert Croes a indica cu desde inicio di gobernacion, Gabinete Wever-Croes ta hibando un maneho pro activo pa baha prijs di awa y coriente pa e pueblo di Aruba. Un di e manehonan cu a bin ta activando y gestionando, ta pa por tin diferente oportunidad y alternativa di suministro di combustibel. Aruba ta den e proceso di transicion pa gas natural. Mientras tanto, mester cumpra "heavy fuel oil" cu ta cumpli cu e especificacionnan cu WEB ta exige, pero di paisnan cu ta ofrece mas barata, cu e meta pa baha e prijs di awa y coriente.

Minister Croes a expresa di ta sumamente contento y orguyoso cu riba un dia manera 15 di Februari 2024, Gobierno ta logra pa e prome barco di "heavy fuel oil" di Venezuela yega Aruba. Cu esaki Gobierno por cuminsa e era, pa logra baha e tarifa di awa y coriente, manera a wordo priminti na e pueblo di Aruba. Esaki sigur ta habri e caminda pa crea e oportunidad pa Gobierno por cumpli cu e promesa aki.

Un di e prioridadnan di Gabinete Wever-Croes ta pa combati costo di bida. Y bahando e tarifa di awa y coriente, ta fundamental. Unabes cu logra baha e tarifa aki, e no lo solamente afecta positivamente cada hogar, sino tambe cada compania, reduciendo asina e gastonan di e compania. Cu menos gasto operacional, e companianan lo por cuminsa reduci prijsnan di producto y servicio pa e clientenan, afectando asina e costa di bida positivamente.

"Combati costo di bida, kiermeen



combati pobreza, combati costo di bida, kiermeen logra progreso, y esaki pami, como Minister di Energia, y formando parti di Gabinete Wever-Croes II, ta e prioridad di mas grandi. Mi ta sumamente contento y orguyoso di mira cu e trabou cu nos a bin ta eherciando tin su frutonan.

Nos ta impulsando Aruba den un era nobo pa bienestar y na interes

di nos Pueblo."

E empeño cu Gobierno a bin ta desplegando, pa busca otro alternativanan, riba 15 di februari 2024 a duna su fruto cu e entrada di e barco transportando e prome carga di HFO na prijs mas barata. Minister Croes a expresa su gratitud na FMSA, TDEA, Harttree y PDVSA pa a coopera pa haci e logro aki na bienestar y interes di nos Pueblo.





# Minister Endy Croes: TA DESEA DIRECTIVA NOBO DI STICHTING FUNDACION ARUBIANO PA MANEHO DI FACILIDADNAN DEPORTIVO HOPI EXITO

Recientemente, Minister Endy Croes a reuni cu e representantenan di Stichting Fundacion Arubiano pa Maneho di Facilidadnan Deportivo (SFAFMD). E fundacion aki ta maneha e piscina na San Nicolas y e piscina na Savaneta. E directiva aki ta atende cu, entre otro, mantencion, traha schedule y dirigi e empleadonan pa garantisar cu e piscina "UpToDate".

Dia 6 di februari ultimo, a tuma luga traspaso di

e directiva anterior, cu nan temporada a yega pa un directiva nobo. Sra. Judesca Briceño, kende ta ex presidente hunto cu Sr. Jacinto Werleman, director di e fundacion aki a haci traspaso di informacion valioso y a cera conoci cu e cuater (4) miembronan di e hunta di directiva nobo.

E hunta di directiva nobo ta consisti di Sra. Jo-Anne Croes, kende lo fungi como presidente di e fundacion y e miembronan di directiva, Sr. Jorge Faro,



Sra. Gilienne Vrolijk y Sr. Johannes Flanegin. Pa conclui, Minister Endy

Croes ta gradici e directiva saliente pa e trabou cu nan a ehersa y ta desea e

directiva nobo hopi exito!

## ARUBA BANK Y AVB A UNI FORZA PA SUBI E NIVEL DI TALENTO DI FUTBOL DI ARUBA

Oranjestad, 16 di februari, 2024 — Un momento special a tuma lugar recientemente na Aruba Bank su sucursal principal pa anuncia e colaboracion entre Aruba Bank y Arubaanse Voetbal Bond pa sostene e programa Talent Development Scheme (TDS) di AVB, cu lo wordo guia pa Chris Beardsley, FIFA Talent Coach. Como partner, Aruba Bank ta reconoce e importancia di inverti no solamente den e presente, pero tambe den e futuro di excelencia y innovacion den futbol mundial pa nos hobennan.

E colaboracion aki ta un muestra di e compromiso di Aruba Bank pa sigi desaroya e futuroan

estelar di futbol di Aruba. E programa TDS di AVB, ta un iniciativa pa forma e futuro di futbol di Aruba door di stimula e potencial di hobennan talentoso. Aruba Bank ta reconoce e importancia di inverti den deporte.

Aruba Bank ta aporta cu un contribucion financiero di AWG 23,328 pa e programa TDS di AVB. Esaki ta subraya nan dedicacion na crecemento y desaroyo di talento futbolistico di Aruba.

Como patronicador, e logo di Aruba Bank lo ta cu orguyo ariba e uniformnan di entrenamiento di tur hungadornan. E representacion visual aki ta muestra e compromiso di



e banco pa stimula talento y contribui na e elevacion di futbol di Aruba tanto na nivel nacional como

internacional. Aruba Bank ta extende gratitud na Arubaanse Voetbal Bond pa e

oportunidad aki. Hunto nos ta construi un exito pa futbol di Aruba.



# Minister Rocco Tjon: STICHTING HUNTO TA OFICIALMENTE UN REALIDAD: UN SIMBOLO DI SPERANSA Y INOVACION PA ARUBA



Diahuebs atardi, significativo den e nos a marca un paso trabounan continuo pa un

enfoka mas compasivo, inclusivo y efectivo pa cu cuido di salud mental aki na Aruba. Asina Minister di Husticia y Asuntonan Social sr. Rocco Tjon a duna di conoce, durante e inauguracion di e edificio di Stichting HUNTO, cual ta un simbolo di speransa y inovacion pa nos isla.

Pa hopi aña e desafionan di salud mental a domina grandemente den nos comunidad, hopi biaha man den man cu silencio, stigma y escasez di recursonan. E apertura di Stichting HUNTO no solamente ta simbolisa e integracion fisico di locual ta psiquiatria y tratamiento di adiccion bou di un solo dak, pero tambe ta muestra di nos compromiso colectivo pa kibra e bareranan existente pa cu esakinan. E iniciativa aki, cual ta alinea cu e maneho di Ministerio di Husticia y Asuntonan Social, pa mehora accesibilidad pa servicionan di salud mental, ta yuda tambe pa trata e listanan largo di espera cu tin, sigurando cu e yudansa ta disponibel pa esanan den necesidad na momento cu mas nan tin mester di esaki.

Cu e inauguracion di Stichting HUNTO, nos ta para keto pa reconoce e lucha cu esnan cu ta enfrentando problemanan di salud mental y adiccion ta pasando aden. Nos ta reconoce e curashi inmenso cu e ta tuma pa busca ayudo y e resiliencia pa supera e desafionan



aki. Stichting HUNTO ta para como un testimonio cu salud mental ta un parti integral di salud general y cu merece e mesun atencion, cuido y recursonan manera cualkier otro aspecto di nos bienestar.

E inauguracion di e edificio di Stichting HUNTO no ta solamente e culminacion di e proyecto aki, pero un principio - un capitulo nobo - aki na Aruba pa un futuro unda cu cuido di salud mental ta accesibel, inclusivo y efectivo pa un y tur. Laga esaki ta un yamada pa accion, pa cada un di nos, pa sigui boga pa concientisacion di salud mental, pa sostene esnan rond di nos den nan momento di necesidad y pa contribui na un comunidad unda cu ningun hende ta keda atras pa motibo di problemanan di salud mental of di adiccion. Hunto nos a pone e prome piedra pa cambio, pero ta door di nos esfuersonan colectivo e vision aki lo por wordo completamente realisa.

Por ultimo, e Mandatario a extende palabranan di gradicimento na tur esnan

involucra den haci Stichting HUNTO un realidad. For di profesionalnan dedica di FMAA y SPD cu a acepta pa uni bou di un solo dak, te na e beleidsmedewerkers y esnan den nos comunidad cu a apoya e causa aki. Boso trabou incansabel, compromiso y dedicacion ta e fundeshi riba cual e iniciativa aki ta para.

Finalmente, laga nos recorda cu e salud di nos comunidad no ta wordo midi solamente pa e bienestar fisico di su miembronan, pero tambe pa e forsa di su sosten pa esnan cu ta enfrentando desafionan di salud mental y adiccion. Stichting HUNTO ta un bon ehempel di locual nos por logra hunto y nos tin pleno confiansa cu su impacto lo wordo sinti pa e generacionnan cu ta bin.

Laga nos sigui for di aki cu e compromiso pa sigui sostene, eleva, y cuida cada miembro di nos comunidad, sigurando cu e portanan di Stichting HUNTO no ta djis un entrada di un edificio mas, pero un portal pa un futuro mas saludabel y prospero pa un y tur.



# Minister Xiomara Maduro di Cultura: CREATIVIDAD Y TALENTO DI NOS HENDENAN A HACI CELEBRACION DI CARNAVAL 70 UNO GRANDIOSO Y EXPECTACULAR

## Pabien, Aruba a luci como un di Carnavalnan mas luhoso y sigur na mundo



Diadomingo ultimo e celebracion di Carnaval 70 a yega su final cu un fabuloso parada di Carnaval y despues e kimamento di Rey Momo cu alaga su testament atras.

E periodo di Carnaval di e aña aki tabata uno cortico pero nos carnavalistanan y nos pueblo a sa di disfruta lo maximo di e dushi temporada. Minister Xiomara Maduro di Cultura ta hopi orguyoso di e creatividad y talento di nos hendenan cu a haci cu Aruba su Carnaval 70 a resulta uno grandioso y espectacular. Nos por a disfruta di e musica varia cu a trece un ambiente fenomenal di alegria y tambe admira e diferente pieza- y disfrasnan bunita decora riba caminda cu luci y briya riba e ruta di carnaval. E mandatario ta hopi contento y ta gradici tur instancia y persona pa nan excelente trabao y cooperacion pa engrandecere nos

celebracion di Carnaval 70. Un gradicimento special ta bay na e organisacion SMAC, bou presidencia di Sr. Darren van Ommeren y su ekipo di boluntario cu a guia henter e celebracion di Carnaval 70. Palabranan di gratitud na tur Reina, Rey, Prins, Pancho den tur categoria y festival, grupo-, cantante-, musico- y participantenan pa nan dedicacion y esfuerso pa asina Aruba y mundo henter por a experencia un mahestuoso parada di Carnaval 70.

Un danki na tur gruponan cu a organisa y participa den e grandioso paradanan: TOB, Infinity, Royal, Dushi, OPC, Colours, Champagne, Unity, Los Laga Bai y Empire. Como tambe na tur banda musical: Quality Brassband, Invaders Steelpan, Shine Music, Groovemaster, Nfusion, Delicious, NBO, Massive Brassband, Jeon, Oreo, Tsunami, YouthXtreme, Solo Banda Show, Buleria, Steelband Mariniers Kazerne Aruba, Musical Time, Dj's y tur compania di sonido.

Danki grandi na tur cosedo, diseñador, decorador, estilista, welderdo, tecnico, chauffeur, hurado, boluntario y tur otro instancia y persona cu pa medio di nan trabao, esfuerso, tempo, dedicacion, creatividad y



talento a haci nos parada uno exitoso, espectacular y grandioso. Un reconocimiento special ta bay tur instancia y organisacion publico y priva cu a contribui pa nos fiesta cultural di mas grandi a bay den un forma bon organisa y sigur manera e.o. Cuerpo Policial, Koninklijke Marechaussee, DOW, IMSAN, Ambulance, CMO(BRA), HOH, EMS, Rode Kruis, Departamento di Cultura, Serlimar, DTI, DIP, Brandweer, Prensa, Quota Club y Famia Planea. Masha danki na cada un y tur, na e pueblo cu a para na banda, tur hunto a haci nos parada di Carnaval 70 luci pa Aruba y mundo henter por a gosa di un di e Carnavalnan mas luhoso y sigur na mundo.

Danki t Pabien na un y tur pa kere den nos

pais y su hendenan, na e patrosinadornan oficial di Carnaval manera Setar, Ban Serio Aruba, Guardian Group, Aruba Airport Authority, CMB, Balashi, Banana Boat Aruba, Garage Centraal Aruba, Elmar NV, EZ Air, CATC y Gobierno di Aruba. Danki tambe na tur otro patrosinadornan cu a contribui cu gruponan pa asina engrandecere nos carnaval.

Aruba un biaha mas a biba su cultura, su Carnaval, cu ta e exposicion cultural mas grandi, bunita y yen di ambiente pa tur participante, nos pueblo y bishitantenan por a gosa y experencia. Nos historia ta keda recuerdo y experencia unico di Carnaval 70. Nos lo topa bek den 2025 cu un otro temporada di Carnaval, nos celebracion di Carnaval 71.

Aruba Masha Danki y Pabien!





## Prome Minister Evelyn Wever-Croes: APERTURA OFICIAL EDIFICIO STICHTING HUNTO



Diahuebs 15 di februari a tuma luga e apertura oficial di e edificio di Stichting HUNTO na caya Appeldam den Dakota. Na e ocasion aki Prome Minister Evelyn Wever-Croes a hiba palabra felicitando y gradiciendo tur cu a haci esaki posibel.

Na Aruba tin un problema di salud mental y adiccion cu ta cuminsa manifesta su mes ya den muchanan relativamente jong y mester ataca esaki cu tempo. A cuminsa traha riba e problematica aki den pasado pero e pandemia a frena esaki y a haci'e pio. El a trece e salud mental

riba otro nivel y e tempo ey a eleva esaki na nivel di crisis y a aloca fondo specialmente pa adresa esaki y awe por wak e resultado.

Institutonan cu tawata traha banda di otro riba e tema di salud mental y adiccion, awe ta traha hunto bou di un capa, esaki di Stichting HUNTO. E edificio ta sumamente bunita y adecua, parti den dos: un parti pa adulto y un pa muchanan jong. Esaki ta haci cu adultonan y e muchanan jong no mester crusa otro. Na Stichting HUNTO e tratamentonan ta wordo duna mesora na adulto y mucha, y esaki ta



algo cu Gobierno a boga p'e mescos pa e lista di espera bira menos y na un momento por wordo elimina por completo.

Minister President a expresaditainmensamente orguyoso di esnan cu a construi e bunita edificio pero principalmente e ta orguyoso di e trahadornan cu ta traha duro y hunto pa atende e tema di adiccion y salud mental. Tambe e mandatario a sigui bisa di ta hopi orguyoso di ta lidera un gobierno cu a pone e proyecto aki como un prioridad y poniendo e ser humano central. Esaki ta inclui salud mental y adiccion cu ta temanan cu mester traha riba nan.

Prome Minister, den su



discurso na e ocasion aki, a tuma e oportunidad pa gradici Minister Glenbert Croes cu desde tempo di e crisisplan a cuminsa den e direccion aki pero lamentablemente a wordo frena pa e pandemia. Na e mesun momento, Prome Minister a manda palabranan di elogio na Minister Rocco Tjon cu a tuma e cartera over di asuntonan social y di salud

mental na e momento ey y hunto cu su ekipo y cu hopi determinacion y vision a persevera y awe por celebra e apertura di e edificio aki. “Un pabien na tur esnan cu ta traha na Stichting HUNTO cu ta traha cu salud mental y pa bringa adiccion di nos muchanan y nos adultonan. Cu Dios bendiciona boso cu e trabou cu boso ta haci”, Prome Minister a expresa.



# 15 FEBRUARI 2024 90 ANIVERSARIO



Diahuebs 15 di februari 2024 a duna inicio na e actividadnan festivo pa cu e celebracion di e di 90 aniversario di sport vereniging Racing Club Aruba, RCA. Tabata na 1934 cu a funda e club y por bisa cu RCA ta e club mas bieu y grandi na Aruba den ramo di e deporte rey, futbol. Pa cuminsa cu e celebracionnan oficial a organisa un santo sacrificio di misa, gradiciendo Dios Tata Todopoderoso pa tur locual E a brinda e club di RCA den su trayectoria imprecionante y historico. Despues di e santo sacrificio a bai na Club di RCA na Solito pa un brindis. Aki tabata tin diferente invitadona presente manera nos destingido minister di Deporte sr. Endy Croes, president actual y diferente ex-president y miembro nan di directiva di RCA banda di hopi miembronan, voluntarionan, mayornan y patronisadornan. Durante e brindis, sra Erin Croes a guia e programa

oficial como maestro di ceremonia caminda tabata tin varios orador cu a hiba palabra y e anochi a culmina den bautismo di uniform di tur e divicionan di nos prestigioso club.

Den e diferente discursonan cu a ser hiba, tur orador a sa di trece puntonan importante dilanti pa cu deporte engeneral pero tambe puntonan remarkable pa cu RCA. Su excelencia, minister di deporte sr.

Endy Croes a enfatisa e importancia di locual ta trata e relacion entre deseo-disciplina-dedicacion y determinacion pa cu deporte y den RCA e punto nan aki ta presenta y ta hasi cu awe RCA ta e club cu tin un historia impresionante den deporte na Aruba y Caribe Hulandes. Tambe e a remarka cu RCA tin mas

titulo na Aruba como campeon di futbol (34) pero tambe tin mas di 20 titulo como subcampeon. Esaki ta ilustra cu RCA a hunga mas cu 50 vez un wega final den su 90 aña di su existencia. E president actual, senyor Jeff Lopez a enfatisa ariba kiko e ta pa sirbi un club di taya manera RCA den forma voluntario, cu amor, dedicacion y perseverancia. Como presidente e y su comision ehecutivo ta sirbi e club incansablemente enfrentando diferente retonan pero tambe momento nan di gran placer cu diferente logronan importante pa cu existencia di RCA y cu su gran deseo ta pa mira turf riba nos veld . Señor

Randolf Lacle como presidente di AVB a subraya tres punto den su discurso. E promer punto tabata e historia impresionante di RCA cu diferente

logronan remarkable den futbol di Aruba y Antiyas Hulandes.

Djey senyor Lacle a subraya e importancia y realse di trabounan boluntario, den union manera un famia,

di generacion pa generacion, y semper cla pa yuda otro clubnan, ta locual cu a hasi posibel pa RCA ta e club mas bieu y mas grandi den deporte aki na Aruba a menciona tambe cu RCA ta e unico club na

Aruba cu den su trayectoria di 90 aña nunca a degrada pa divicion uno. Como ultimo orador tabata e

carismatica Mandy Leijenaar, kende a splica cu un patronisador no ta solamente sostiene un club financieramente pero e ta e compromiso y e confiansa cu bo ta para y confia den e vision y mision di e club.

Den number di directiva di RCA, nos kier a hasi uso di e oportunidad aki pa extende un palabra di gratitud na e comision organisatorio y sin laga afo Elite pa un tremendo evento pa cu inicio di e celebracionan di e 90año nan di RCA. Pa por celebra e milestone aki e ta refleha ariba hopi deidicacion, respet, amor y disciplina. Pesey un bes mas un palabra di gratitud ta bai tambe na nos miembronan, coachnan, leidsternan, hungadornan, patronisadornan y demas boluntarionan y sin laga afor nos fiel fanaticada Tricolor. Sin boso e 90ña nan aki lo no tabata posibel. Y keda penditente pa tur locual ta bira e gran aña di celebracion.

Pabien famia, cu poder di Dios SV RCa lo sigui pa hopi aña mas!

## CANDELA DEN UN CAS NA MONTE VERDE

Diaranson mainta tempran a drenta informe di un cas na candela na Monte Verde. Mesora a dirigi tanto polis como brandweer na e sitio. Na yegada di e patruya a bin compronde cu aki ta trata di un candela cu a cuminsa den cushina. Na yegada di brandweer mesora nan a combati e candela aki. Afortunadamente ningun persona a resulta herida. Polis a tuma datos di e incidente aki.





# Miembro di Parlamento Ricky Hoek (MEP): SANTOS DO NASCIMENTO TA E 'MASTERMIND' DEN LABA MAN PARTI 1

Aruba 16 februari 2024: Parlamentario Hoek di Fraccion di MEP a tuma nota di e ponencia di señor Rycond Santos do Nascimento cu MEP ta cobarde pa combati corrupcion.

Lamentablemente ora nunca bo a tuma accion pa combati corrupcion, bo no por reconoce e pasonan pa combati corrupcion tampoco. Ta un realidad cu MEP ta trahando proactivo pa caba cu corrupcion. Y mi ta ripiti, e realidad ta cu MEP a bin cu tres diferente ley cu ta regarda integridad. Y e partido cu Santos do Nascimento te cu un corto tempo atras tabata duna les y afilia na dje, a vota contra tur tres ley di integridad.

Santos do Nascimento ta indica cu ley no ta nifica nada, si hende no ta tene su mes na dje. E pregunta ta e ora: Ki bo estudio ta bal y ta ki tipo di les a ser duna na su partido berde cu nan a vota contra di tur tres ley?

Contrario na Santos do Nascimento su ponencia, Prome Minister Sra. Evelyn Wever-Croes a brinda tur transparencia den e caso Tulipan. Mas ainda nos Fraccion a pidi un Reunion Publico pa trata e rapport di CAD y Fraccion di MEP a haya oido pa esaki. Algo cu nunca a y lo wordo practica pa e partido cu Santos do Nascimento tabata sostene

y forma parti di dje. E mas tristo ta cu Santos do Nascimento a postula su mes riba un lista sabiendo cu e lo ta hunto cu un candidato cu tabata un sospechoso y awo culpabel den caso di corrupcion. Pero awe Santos do Nascimento kier laba man, pero ta e ta e mastermind di scol di corrupcion crioyo di partido AVP.

Parlamentario Hoek ta admiti cu e tres leynan di integridad ta apenas e comienso di e fundeshi cu nos ta creando pa un pais liber di corrupcion. Pesey, (1) gobierno a propone pa introduci un Integriteitskamer (2) ta empodera CAD pa investiga caso irregular (3) tur persona cu ta comete actonan corruptivo, lo mester asumi nan responsabilidad y mester retira for di nan posicion te ora cu Ministerio Publico caba cu investigacion.

Un diferencia grandi compara cu Gabinetenan Eman I y Eman II, unda cu Contraloria General (ARA) a adverti cu tin cosnan cu a cana hopi robes, pero no tin transparencia pa laga investiga e ex-ministernan Croes, Sevinger, Oduber, Visser, Dowers of Hooijboer-Winklaar. Di cual tur a conoce patronahe politico y añanan di bonanza riba custia di pueblo.

Similaridad den casonan Tulipan, Kwihi, Anglo ta cu Gabinete Wever-Croes



mes a entrega keho manera cu a tuma nota cu irregularidadnan a wordo señala. No tabata oposicion, ni señor Santos do Nascimento a entrega keho na autoridad, pero ta gobierno mes a percura pa instancia concerni haci nan trabou. Para na banda y papia di corrupcion ta facil, pero unda e kehonan oficial ta keda pa duna e instancia di husticia e base pa cana su caminda legal contra combatimento di corrupcion?

E politica di laba man no ta funciona. Nos pais mester di politiconan y ciudadanonan cu ta bisa loke nan ta haci y haci loke nanta bisa. Maske notabata facil y a conoce resistencia, Parlamento number 10 y number 11 a introduci un transformacion den nos cultura politico pa eradica corrupcion. Tur proyectonan cu no ta transparente mester wordo investiga. Adicionalmente,

MEP a bin cu e 'tussentijdse rapportage' cu ta e Presupuesto Supletorio pa asina tin un miho control riba e uso di finanzas di pais Aruba. Pues, si constata cu tin proyecto dudoso esaki lo no wordo ehecuta y si un politico a haci un acto corruptivo e lo mester retira. Sinembargo e unico cu a keda, manera tur hende sa ta un parlamentario di AVP cu señor Santos do Nascimento a bin ta

sostene desde un principio. B erdad ta si, cu awe e no ta sostene nan mas, pero e cabaron a drumi hopi tempo den lodo y awe por papia con stinki e lodo ta hole. Y ta comprondibel cu eleccion ta cerca y ta busca modo pa laba man. Tempo lo demostra si di berdad e ta un di nan of cu e tambe lo kier combati corrupcion crioyo efectivamente, Parlamentario Hoek a finalisa bisando.

## Clasificados

**SOLODIPUEBLO@GMAIL.COM**

**CEL. 585 9500**



# ALGO GRANDI Y BON LO SOSODE NA SAN NICOLAS

## DIASABRA ANOCHI

Den Iglesia Pentecostal di Aruba.

Algo grandi y bon ta bini di Dios, algo cu ta cambia curason, y mente di hende algo cu por pone algun yora y algun hari di goso, ora nan tende y mira locual Dios por haci den bida di hende.

Diasabra 17-2-2024 pa 7or anochi algo grandi y bon lo sosode de Iglesia Pentecostal di Aruba situa dilanti di Macro na San Nicolas, ora 4 persona, conta nan testimonio kico Dios a haci.

Prome lo bo por scucha un ama di cas duna su testimonio con Dios a sake for di droga. Y asina tur hende por reconoce e peliger con droga por destrui e bida di un ama di cas.

Na di Dos lugar lo bo scucha con Dios por scapa

bida di un persona cu por poco a yega laat cu su curason na Bucaramanga Colombia, pero tambe nos tur tin cu reconoce cu pa Dios nunca no ta laat y Dios a dune un curason nobo.

Na di tres lugar lo bo por tende for di boca di un hoben cu rebeldia, contra Dios y su mayornan y con e por a resulta den asuntonan di Homosexualismo activo, kico e tabata haci, con e tabata comporta cu su mayornan, y con e aleha for di Dios. Pero tambe con awor e ta bek sirbiendo Dios.

Na di cuater lugar lo bo por scucha con Dios a libra un persona for di Droga, Homosexualismo y Bruheria. Y awe e por ta un lider, trahando pa Señor.

Ta un reto pa tur mayor y tur hende na Aruba especialmente nos hobennan pa nan tey

diasabra anochi na Iglesia Pentecostal di Aruba pa 7 pm en punto, Nos lo Alaba Dios y tambe lo tin snacks y cos di bebe gratis.

A yega tempo pa Aruba wordo confronta cu e berdad cu tin tras di hopi maldad cu ta tuma lugar, y tambe mira cu wowo cla cual ta e destructor di famia y matrimonio.

Diasabra nochi di 7pm pa 9 pm laga nos tur bini SAN NICOLAS CAMINDA ALGO GRANDI Y BON TA BAY SOSODE.

Sinceramente,

Pastor Marcel Balootje

Senior Pastor, Iglesia Pentecostal di Aruba.

Tel 7403237.

## SAVANETA\* \*TA\* \*DESPEDI\* \*DI\*

## \*CARNAVAL\* \*70\* \*CU\* \*SESION\* \*FOTOGRAFICO\*

## \*DI\* \*SU\* \*REINA\* \*NAN\*



Recientemente Fundacion Savaneta Prome Capital a haci un sesion fotografico di Reina nan di Carnaval di Savaneta di antes y di Reina nan Fundacion Savaneta 2024 pa despedi di Carnaval 70. Fotografo Michael Arends, como tambe Nevin Henriquez,

a keda encarga di saca e potret historico di e Reina nan.

E prome Reina Hubenil di Savaneta na 1962, Sra. Elsa Beaujon-de Kort, tambe tabata presente.

Famia y amistades di e Reina nan tambe a saca

potret cu nan. Despues di hopi aña Savaneta tabata bek den Carnaval cu nan Parada di Mascarada. Fundacion Savaneta Prome Capital kier a gradici tur esnan cu a yuda pa e Parada di Mascarada ta un exito total.





# MINISTER ENDY CROES TA FELICITA S.V. DAKOTA CU BAUTISMO DI NAN UNIFORM NOBO



Diahuebs ultimo, den un esfera ameno na Centro di Bario Dakota a tuma luga bautismo di uniform nobo di ekipo di Dakota. Minister Endy Croes a pasa pa saluda y felicita ekipo di Dakota cu nan uniformnan nobo di Division di Honor pa e temporada 2023-2024 di playoff di futbol.


Minister Endy Croes ta gradici e patrocinadonan cu ta sostene e deporte di futbol y ekipo di Dakota. Mandatario di Deporte a indica cu el lo sigui aporta pa yuda deporte den su totalidad.

Sr. Carl Michael Bikker a indica cu Centro di Bario



Dakota y e organisacion di futbol a reconoce y gradici e patrocinadonan pa nan gran aporte, paso pa mantene un organisacion firme bo tin mester di yudansa. Danki na e patrocinadonan a logra cumpra uniform y material pa e muchanan por train. Ademas di esaki, a comparti e vision y plan di Dakota. Tambe, Sr. Bikker den nomber di directiva di Centro di Bario Dakota a gradici Minister Endy Croes pa su apoyo y pa aporta na nan organisacion. Sr. Bikker a enfatisa cu semper cu Centro di Bario Dakota acerca e mandatario de Deporte pa un yudansa, nunca el a duda y semper a yuda. Alabes, Sr. Bikker ta gradici Minister Endy Croes pa su empuhe pa yuda Centro di Bario Dakota. Pronto lo inaugura un di e canchanan di basketball di mas bunita di Aruba.

Por ultimo, Minister Endy Croes ta desea e ekipo di Dakota hopi exito den e playoff di futbol cu ta inicia e weekend aki. Cu deseo,



medicacion, determinacion  
disciplina ta logra. Exitos!

	9		5		3		1 7
				1			
	8						4 3
		2				6	
4	5						7
				3			
7	4		2		5		6
					4		2

8							
		3	6				
	7			9		2	
	5				7		
				4	5	7	
			1				3
		1					6 8
		8	5				1
	9					4	



FORTALEZA PA FAMIA

Scirbi pa Pastor Marcel Balootje.

FE Y CONFIANSA TA DUNA NOS UN BIDA

SOSTENIBEL DEN CRISTO HESUS

Bendiciona ta e hende cu ta confia den Señor, y kende su confiansa ta den Señor. Pasobra e lo ta manera un palo, planta canto di awa, cu ta manda su raisnan bay na un corida di awa, y cu lo no tin miedo, ora calor bini, ma su blachinan lo ta berde, y den e aña di segura e no ta preocupa, ni laga di duna fruta.(Jeremias 17:7-8).

Ora un hende tin fe y confiansa den Dios e ta fructifero tur momento, sea cu e ta wordo reconoce si of no, of su amigonan ta contento cune of no, of cu envidia lanta contra dje, e no ta desmaya , pasobra su confiansa ta den Dios. Tin un diferencia ora nos ta bisa cu boca cu nos ta kere den Dios, y nos sa masha bon cu no ta asina den nos curason, pasobra kere y confia ta dos palabra grandi, pasobra esun cu tin confiansa den Dios, masha poco biaha ta murmura, pasobra e sa den ken e ta confia, y Dios ta honra su confiansa.

Lo Bo warda den pas perfecto, esun cu su pensamiento ta permanece den Bo, pasobra e ta confia den Bo, Confia den Señor pa semper, pasobra den Dios e Señor, nos tin un Baranca eterno.(Isaias 26:3).

E palabra di Dios, no ta siña nos confia den Señor un tiki so, of ora nos tin necesidad so, of ora hende laga nos na caya, pero e ta bisa nos pa confia den Señor pa semper, esey ta nifica, deposita bo confiansa den Señor y no move for di Señor, keda para firme ,den tempo bon y tempo malo pasobra Señor mes lo sostiene bo.

Un partido politico ta corre campaña pasobra nan tin mester di hende pa sostiene nan, pasobra si hende no vota pa nan, ta bira dificil pa nan por logra drenta parlamento, te pa nan pensa di tin un minister, den un palabra bisa, nan mester di hende cu ta kere cu nan por cumpli

cu locual nan ta priminti. Pero lamentablemente hopi biaha ta resulta cu no ta asina. Pero ora un hende tin mester di Dios, den su bida, y kier pa Dios bendicione, e mester pone su confiansa den Dios. Pasobra cielo y tera por pasa, pero e palabra di Dios no ta pasa.

Locual Dios priminti, Dios ta cumpli cune, Dios no ta hende pa E gaña, Dios ta fiel, tur hende tin mester di Dios, Dios semper tey, e ta Todopoderoso. Dios no tin mester di corre ningun campaña pa agrada hende, ta hende mester agrada Dios, cu nan Fe , y nan confiansa den Dios.

Dios a primiti lo siguiente: Te na boso biehes Ami lo ta mescos, y te na boso aña nan di cabey blanco, lo Mi carga boso! Mi a traha boso y lo mi sostiene boso, lo Mi carga boso y lo Mi libra boso.(Isaias 46:4).

Nos mester comparti cu nos hobennan pa asina nan no deposita nan

confiansa den material, y no laga ciencia y cosnan digital domina nan bida, pasobra poder ta di Dios, y nos Dios no ta cambia, e ta mesun di ayera, awe y pa semper. Pasobra Señor Dios ta un solo y un escudo, Señor ta duna gracia y gloria. E no ta keda sin duna loke ta bon, na esnan cu ta

cana den rectitud.( Salmo 84:11). No tene miedo pasobra Mi ta cu bo, no desmaya pasobra Mi ta bo Dios, lo Mi fortalese bo y lo Mi s ostene bo cu Mi man drechi di husticia.( Isaias 41:10). Sinceramente, Pastor Marcel Balootje



PRONOSTICO DI TEMPO

PRONOSTICO DI TEMPO VALIDO TE DIASABRA 17 DI FEBRUARI 2024, 18:00 ORA

-UN ALERTA PA BIENTU DURO TA NA VIGOR...  
-UN AVISO PA BOTO CHIKITO PA LAMA HABRI Y ESPECIALMENTE AREANAN CERCA DI COSTA OOST TE NOORDWEST LO KEDA NA VIGOR TE OTRO AVISO...  
TEMPO:  
AWE TARDI Y AWE NOCHI: PARCIALMENTE NUBLA Y GENERALMENTE SECO  
DEN MARDUGA Y MAYAN: PARCIAMENTE NUBLA CU UN POSIBLE AWACERO PASAJERO  
TEMPERATURA MAXIMO 32 GRADO CELSIUS  
TEMPERATURA MINIMO 26 GRADO CELSIUS  
INDICE DI CALOR (HEAT INDEX) DEN Y ROND DI ORANAN DI MERDIA: 33 PA 38 GRADO CELSIUS

MENOS DI 1 MM; LOCALMENTE ESAKI POR TA DIFERENTE.  
REGISTRACION DI TEMPERATURA (GRADO CELSIUS) Y  
AWACERO (MM) DEN ULTIMO 24 ORA (8'AM PA 8'AM):  
AIRPORT : MAX 32 / MIN 26 / 0.0 MM  
WESTPUNT: MAX 31 / MIN 26 / 0.0 MM  
STA ROSA: MAX 32 / MIN 26 / 0.0 MM  
PRONOSTICO DI TEMPO PA PROXIMO 3 DIANAN:  
PARCIALMENTE NUBLA CU UN POSIBLE AWACERO PASAJERO.  
BIENTOLOTA FOR DI DIRECCION NOORDOOST TE OOST  
Y MODERA TE BASTA FUERTE, FUERTE TE DURO, TIN  
BEZ HOPI DURO DEN RAFAGA.  
TEMPERATURA (GRADO CELSIUS)  
MAX / MIN LO TA: 31 / 26  
DEPARTAMENTO METEOROLOGICO ARUBA  
DIABIerna 16 DI FEBRUARI 2024 17:00 (21:00 UTC)



HALA ROSEA LIBREMENTE

Cu introduccion di e ley aki DVG y Gobierno ta trata na reduci e risico pa malesanan cronico cu es cu ta huma por desaroya, como tambe proteha e 'second-hand smoker' y preveni e hoben di cuminsa huma na un edad iona.



## ORACION DI DIA



**Un dia fructifero cu hopi gracia, amor y paz di Señor.**

“ Señor, scucha mi oracion, paga tino na mi grito di auxilio!”(Salmo 86, 6) Nos a drenta den e temporada di Cuaresma. Como un bon cristian nos ta prepara nos mes durante 40 dia largo pa nos ta mas cerca di Señor. Esaki nos ta haci'e door di oracion, yuna y yuda nos prohimo. Tambe ta un bon momento pa nos analisa nos mes. Puntra nos mes, si e oracion cu nos haci na Señor ta sali for di nos curason.

Si e palabranan cu nos ta uza, ta yena cu fe.

Y no analisa so nos relacion cu Señor, pero tambe cu nos prohimo. Nos no por bisa cu nos a haci lo maximo, mientras nos a bira lomba pa nos ruman. ....Mi ta responde bo: "Ata Mi aki"! si bo stop di oprimi otro..." Isaías 58, 9.

Anto no laga e preparacion solamente durante Cuaresma. Haci'e un custumber pa cada rato nos analisa nos bida como un bon cristian.

Laga e temporada aki sigui engrandece nos fe. Oracion: Señor mi Dios, hunto cu Bo Yiu Cristo Hesus y Spirito Santo duna mi e forza y animo, pa berdaderamente mi por limpia mi alma y curason, pa mi por yega mas cerca di Bo. Amen.

## WEGA GRANDI DIASABRA AWOR



## Obituario

Publica serka nos anuncio di fayecimento di bo ser keri.  
Nos tin 2 pakete pa ofrece;

**Pakete 1:** Anuncio di fayecimento te dia cu e defunto ser dera

Gradicimento y invitashon pa misa pa 3 dia Afl 250,00

**Pakete 2:** Anuncio di fayecimento te dia cu e defunto ser dera

Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

**Pa mas informashon por tuma contacto cu oficina na  
585-9500 of na 741-4554**

Calabas/Kudawecha - Shonnan amante di bon domino, Team Snor tin tur intencion di sigui aña 2024 cu solamente victoria tras di victoria! E ekipo di e flamante "Snor" Perez, bou guia strategico di Captain Magda, e biaha aki kier habri su buki di teoria di domino riba e ekipo cu ta 'dakloos', 'homeless', e team cu ta 'hang out' bou dje kwihi, esta nada menos cu Team Bou Palo Boys!

Diasabra awor, 17 di februari, cuminsando pa 8'or di anochi, lamper

cu strena lo corta aya n'e unico y mundialmente famoso Domino Square Garden na Kudawecha, ora e dos chubato nan aki dal cabes contra otro! Aña ta habri Bou Palo Boys cu sed pa venganza y come back! Nan bista ta riba nan rival cu a laga nan palo di kwihi sin un blaachi biaha pasa. Snor lo por wanta e presion sin bula un valve? Shonnan, e contesta ta diasabra awor 8'or na Domino Square Garden! Manera semper, entrada pa pueblo ta totalmente gratis y e snacknan

durante halftime lo lora completamente por nada. Djis yega!





# FUNDACION LEAD BY DESIGN Y CEDE ARUBA TA START PROGRAMA DI BARIO LEAD BY DESIGN



Cu un enfoke holistico pa yuda hobennan desaroya

den cuidadanonan integral capaz di prospera den cada area di nan bida, Fundacion Lead by Design den colaboracion cu CEDE Aruba ta organisa un programa den bario titula, "Lead by Design" - Lidera por medio di Diseño.

Vision y mision di fundacion Lead By Design Fundacion Lead By Design — Funda pa Sra. Sharleen Tromp, Entrenado Certifica di Gallup Strengths, Docente, Entrenado di Personalidad y Desarroyo di Talento — su vision ta pa co-crea y sostene un cultura di bienestar pa transforma nacionnan. Cu mision pa educa y lanta nacionnan, rednan y barionan pa florence, y posiciona otronan, pa transformacion y impacto social.

Den colaboracion cu diferente coach, e tayernan holistico lo prove'e oportunidadnan balioso unda hobennan por siña, practica y integra principionan balioso den nan bida. E tayernan aki por cubri un variedad di topico cu ta eleva bienestar,

desarroyo propio y interconexión. Riba tereno social lo bay duna tayernan cu lo enfoca riba desaroyo di inteligencia emocional, nivel di comunicacion, y habilidad interpersonal pa tin relacionannan sano. Riba tereno di salud lo cubri nivel di consumo, pa hiba un estilo di bida unda e consumo ta saludabel, como tambe practicanan di bienestar general cu ta sostene salud fisico. Bienestar financiero, con pa maneha bo finanzas, presupuesta bo maneho pa alcanza prosperidad. Tambe lo cubri e topico di

carera/proposito unda lo prove'e recursonan pa tuma desicionnan basa riba informacion concreto, alinea cu nan carera/proposito. Riba tereno Empresarial, lo encurasha un mentalidad di empresario, sosteniendo hobennan cu ta interesa habri nan propio empresa, y por ultimo comunidad, pa encurasha nan involucra den actividad y eventonan comunitario. Detaye programa Lead By Design

E programa Lead By Design lo cuminsa core den barionan di Piedra Plat, Santa Cruz y Noord, entrante e siman di 4 di maart 2024 y ta consisti di 14 sesion. E lo ta pa hobennan entre edad di 16 pa 18 aña di edad. Participacion ta gratis, danki na CEDE Aruba y e Centro di Barionan cu ta sponsor pa sostene e gastonan involvi. Por solamente tuma un maximo di 20 hoben. Pa cu esaki lo bay tin anochi informativo pa tur tres bario unda e hobennan por haya informacion y registra.

Anochi di informacion Pa bario di Piedra Plat esaki lo ta dia 19 di februari 2024, orario lo ta 5:30 pm na Fundacion Centro Famia Piedra Plat. Pa bario di Santa Cruz, dia 21 di februari 2024, orario lo ta 6:00 pm na Centro di Bario Santa Cruz. Y pa bario di Noord, dia 22 di februari 2024, orario lo ta 6:00 pm na Centro di Noord. Pa mas informacion por semper tuma contact via +297 733 0377.